

# NEWSLETTER

## 2018.

### septembar



# O USPJEHU I ŽIVOTNIM CILJEVIMA NA MJESEČNOM SASTANKU STIPENDISTA

**– NIHAD BILIĆ, VLASNIK KOMPANIJE „BEST & TEAM“**

Svakog mjeseca, kako to obično biva, studenti stipendisti se okupljaju na dobro poznatom mjestu, mješevnom sastanku u Sarajevu. Kako bi istom prisustvovali, neki stipendisti pređu i veću kilometražu, ali naravno, uvijek s ciljem razmjene mišljenja i stavova, stjecanja novih znanja i prijateljstava.

► Tako je bilo i ovaj put.

Nakon pozdravnih i uvodnih riječi učitelja Rame, naše Lejle i Rabije, stipendiste je pozdravio i jedan od onih koji Fondaciji pružaju nesebičnu podršku, donator Nihad Bilić, vlasnik kompanije „Best & Team“. Ovaj

call centar posluje s kataloškim firmama s područja Njemačke, Austrije i Švicarske.

O svojoj kompaniji i njenom nastanku pričao je kratko, a onda se bazirao na velike komponente života: **CILJ I USPJEH**.



Ciljeve svi kreiramo, a onda biramo sredstva za njihovu realizaciju. Svakako, prvo postavljamo one male, a onda, stepenicu po stepenicu nastojimo doći do uspjeha. Nijedan put nije u potpunosti ravan, pa tako i na putu do uspjeha često nailazimo na prepreke, te je, stoga, uvijek dobro imati rezervni plan i biti spremna za iznalaženje neke alternative.

Pored izlaganja i sugestija našeg gosta, koje su se odnosile na to kako da postavljamo ciljeve, čega sve treba da budemo svjesni i koji je najbolji put ka uspjehu, aktivno učešće na ovomjesečnom sastanku su imali i studenti stipendisti. Govorilo se o važnosti prakse u svrhu primjene teorije, ali i o odlasku mladih iz Bosne i Hercegovine.

U tome je Nihad Bilić isključiv: „Da, treba otiti u inostranstvo, educirati se, ali potom se vratiti ovamo i prenijeti stečeno znanje.“ Studenti su se složili, te istakli da je odlazak u inostranstvo prihvativljiv jedino u svrhu edukacije.

Nakon izlaganja našeg gosta, mentorima su podijeljena pisma koja trebaju predati svojim učenicima, a onda je odvojeno vrijeme za upoznavanje. Stipendisti su još jedanput iskoristili sastanak da steknu poznanstvo s nekom novom osobom, a ko zna, možda i novim prijateljem, te je ovomjesečno druženje bilo jako produktivno u svakom pogledu.

**Do sljedećeg sastanka, hrabro koračanje prema zadatim ciljevima!**

Belma Zukić



## Za dugogodišnju podršku, saradnju i doprinos: Komisija Fondacije Hastor dodijelila zahvalnice učitelju Rami Hastoru i Nermini Smajić

Učitelj Ramo Hastor i Nermina Smajić ključne su osobe u procesu podizanja temelja Fondacije Hastor, a ovu zaslugu prepoznala je Komisija Fondacije Hastor koja im je proteklog mjeseca uručila prigodne zahvalnice i poklone te na taj način odala skromnu počast pokretačima naše Fondacije.



Čini se besmislenim govoriti i pisati o doprinosu učitelja Rame uspostavljanju i etabriranju Fondacije Hastor. Svi koji su imali sreće da sretnu i upoznaju učitelja, porazgovaraju s njim, sarađuju i druže se, vjerujem da nisu ostali ravnodušni. Svaki susret i razgovor s ovim izuzetnim čovjekom poseban je. Svaka njegova riječ, savjet i uputa, muzika su za sagovornikove uši. I to ne bilo kakva muzika. To je muzika koja nadahnjuje i hrani svog slušaoca te ga motiviše na činjenje dobrog. Za druge i za sebe. Ako Fondaciji Hastor pokušamo dati lik i udahnuti dušu, negde u sebi bismo sigurno zamislili lik učitelja Rame, njegovu nevjerovatnu osobnost i toplinu kojom zrači. Ako bolje razmislimo, shvatimo da su Fondacija Hastor i učitelj Ramo nerazlučivi. I zaista, pri svakom spomenu Fondacije Hastor, uvijek prvo pomislimo na učitelja.

Nije slučajno da je prije tačno dvanaest godina upravo učitelj Ramo, zajedno s osnivačem naše Fondacije, g. Nijazom Hastorom, započeo osnivačku bajku Fondacije Hastor. Ne sluteći vjerovatno u kakvu veličinu će ova fondacija prerasti, koliko će života promijeniti i mladih ljudi nadahnuti, penzionisani učitelj Ramo Hastor lično je obišao i pronašao prvih tri stotine stipendista. Tokom proteklih dvanaest godina, učitelj je prešao nebrojeno kilometara i posjetio oko tri hiljade stipendista Fondacije Hastor, rasutih na području cijele Bosne i Hercegovine.

O liku i djelu Rame Hastora, njegovom odnosu prema ljudima, saradnicima, a posebno prema svojim stipendistima, njegovom pristupu i posvećenosti radu, odgovornosti i temeljitosti, čini se, naizgled, uzaludnim govoriti i pisati.



Pored učitelja Rame, osjećamo dužnost da se zahvalimo i osobi koja je, također, podigla temelje Fondacije Hastor, pružila nesebičnu podršku u administrativnom dijelu, te svojim idejama doprinijela Fondaciji u organizacijskom i funkcionalnom smislu. Ako ste se ikad zapitali odakle je došla ideja o volontiranju unutar Fondacije, te ideja o mjesecnim druženjima studenata - idejni tvorac ovog mehanizma Fondacije je Nermina Smajić, prva volonterka Fondacije Hastor.

*Thank you!*



Učitelj Ramo Hastor i Nermina ključne su ličnosti u procesu podizanja temelja Fondacije, a ovu zaslugu prepoznala je i Komisija Fondacije Hastor koja im je proteklog mjeseca uručila prigodne zahvalnice i poklone te na taj način odala skromnu počast pokretačima naše Fondacije.

Ovaj tekst posvećujemo svim bivšim, sadašnjim i budućim stipendistima. Da pamtimo osobe zaslužne za nastanak, podizanje i etabriranje Fondacije Hastor.

Džulisa Otuzbir

## POTPISIVANJE UGOVORA S OSNOVCIMA I SREDNJOŠKOLCIMA ZA ŠK. 2018/2019.

Potpisivanje ugovora o stipendiranju za školsku 2018/2019 započeto je sredinom augusta tekuće godine. Upravo u tom cilju tim volontera Fondacije Hastor obišao je teritorij cijele BiH kako bi ugovori bili sklopljeni s 1586 učenika osnovnih i srednjih škola.

Pri samoj organizaciji pomenutog procesa pomogli su i marljivi studenti, stipendisti Fondacije, a sklapanje ugovora zvanično je finalizirano u srijedu, 26. septembra, kada su isti potpisani za učenike koji formalno obrazovanje stječu u nekoj od općina s područja Kantona Sarajevo. Učitelj Ramo Hastor, u okviru svog obraćanja prisutnim učenicima i njihovim roditeljima, uputio je iskrene čestitke izrazivši pri tome nadu da će i oni sami na prav način spoznati značaj prilike koja im je i ove godine pružena. Direktor Fondacije Hastor, Seid Fijuljanin, prvenstveno naglašava kompleksnost i važnost odnosa roditelja i njihove djece istakavši kako je od esencijalnog značaja da upravo roditelji posredno pomognu Fondaciji pri ispunjenju njene elementarne misije. Ta pomoć se, istakao je, značajnim dijelom ogleda u doprinisu izgradnji odgovornosti, te radnih navika kod djece, ali i u razvijanju osjećaja empatije, naročito kada su u pitanju oni kojima mala pomoć može predstavljati mnogo. Općepoznata je činjenica da se Fondacija Hastor permanentnim procesom volontiranja, kao bazičnim segmentom svog rada i dugogodišnjeg progresa, izdvaja od ostalih sličnih organizacija i fondacija. Dakle, stipendisti Fondacije, kao primarni nosioci naše budućnosti, obavezuju se da vlastitim ponašanjem, uspjehom, ali i volonterskim djelovanjem u svojim zajednicama, opravdaju privilegiju koju su stekli postavši dijelom Fondacije, te da na taj način služe kao primjer svojim vršnjacima.



Amina Vatreš

Dugoročno gledano, svi navedeni kvaliteti koje jedan stipendista treba posjedovati, reflektiraju se i na sliku bh. društva u cjelini, u čemu zapravo i leži misija Fondacije - izgraditi kvalitetniju i u mnogome svjetliju perspektivu za buduće generacije.

Ugovore o stipendiranju učenici i studenti potpisuju već 12 godina pri čemu opseg porodice Fondacije Hastor eksponencijalno raste, a lanac njenog ustrojstva biva sve stabilnijim i čvršćim. Naime, nakon zaključivanja ugovora sa studentima, koje je planirano za novembar, kao i raspisivanja konkursa za nove studente, Fondacija će se moći ponositi s blizu 2000 stipendista. Ovu brojku čini još većom i utjecajnijom činjenica da Fondacija Hastor danas predstavlja najveću fondaciju ovakve vrste u BiH, ali i u regionu.

Fondacija Hastor će i u budućnosti nastaviti živjeti svoju dalekosežnu misiju budući da svaki potpisani ugovor predstavlja jednu veliku odgovornost, ali i jedinstvenu priliku, priliku za bolje sutra. Sutra koje nas, kako ističe Seid Fijuljanin, čeka onda kada naučimo pomagati jedni drugima. Pomagati ne zato što očekujemo izvjestan vid naknade, već isključivo zbog toga što se na taj način osjećamo sretnijim i ispunjenijim ljudima.

Amina Vatreš

## JEZIČKO – PRAVOPISNE NEDOUMICE

U ovomjesečnom izdanju Newslettera Fondacije Hastor predstavljamo vam rubriku pod nazivom: FH učionica.

Rubriku će voditi i uređivati naš stipendista Razim Medinić, profesor bosanskog jezika i književnosti, student magistarskih studija na Univerzitetu u Tuzli. Kroz zanimljive priče i edukativne priloge trudit ćemo se da otklonimo većinu aktuelnih nedoumica.

### IME, PREZIME I NADIMAK

- Ustaljena je praksa u bosanskom jeziku da se prvo piše ime, a zatim prezime. Izuzetak može predstavljati popunjavanje rubrika u raznim obrascima u kojima ima uputa da se prezime piše na prvome mjestu. Od pravila se može odstupiti i u slučajevima kada treba praviti kakve preglednije spiskove po abecednom poretku. Tada se, radi lakšeg snalaženja u tim spiskovima, prvo piše prezime, pa ime.

- Jedan pravopisni problem može se javiti i kada uz ime i prezime treba pisati i nadimak, koji se piše velikim početnim slovom i koji je za neke, posebno historijskeličnosti, često osoben znak prepoznavanja. Neki takva imena i prezimena od nadimka odvajaju crticom. Takve pravopisne pogreške vidjet ćemo i danas na raznim spomen-pločama, ali i u štampi i knjigama:

*Fadil Jahić-Španac, Mitar Trifunović-Učo i sl.*

- Pravilo je da nadimke od imena ne treba odvajati crticom, bez obzira na to da li je nadimak na kraju imena ili u nekome drugom položaju:

*Josip Broz Tito, Fadil Jahić Španac, Mehmedalija Mak Dizdar, Musa Čazim Ćatić i sl.*

### IME I DVA PREZIMENA

Ako neka ženska osoba ima dva prezimena, između njih se piše crtica:

*Hanifa Kapidžić-Osmanagić, Đulzara Begić-Hasanagić i sl.*

Pri promjeni po padežima, ime se mijenja, a prezimena ostaju neizmijenjena:

*Đulzare Begić-Hasanagić, Đulzari Begić-Hasanagić i sl.*

Ako muškarac ima dva prezimena i ako se oba mijenjaju po padežima, ona se pišu bez crtice:

*Hasan Alibegović Mehić, Hasana Alibegovića Mehića, Hasanu Alibegoviću Mehiću i sl.*

Ukoliko neki muškarac ima dva prezimena, od kojih se prvo mijenja, a drugo ostaje u istom obliku, onda se između njih piše crtica:

*Mihailo Polit-Desančić, Mihaila Polit-Desančića i sl.*

Priredio: Razim Medinić,  
prof. bosanskog jezika i književnosti

## VRHUNAC ŽELJA

Druga polovina augusta i prva polovina septembra 2018. godine prođoše u potpisivanju ugovora između Fondacije Hastor i roditelja ili staratelja učenika koji primaju stipendiju Fondacije Hastor. Fondacija Hastor se razvila do blizu 2000 stipendista te sad zahtijeva više grupa volontera koji će izaći na teren i donijeti pripremljene ugovore na potpis ovlaštenim licima.

Ugovori su potpisani od strane direktora Fondacije Hastor, Seida Fiuljanina. Roditelji i direktori škola potpisuju u općinskim ili u školskim prostorijama, ovisno od toga gdje je administrativni tim (Amela Lejla i Rabija) dobio odobrenje i pozvao roditelje, a općinski organi vezani za obrazovanje pozvali direktore škola, čije učenike stipendiramo kako bi i oni znali koji su njihovi učenici stipendisti Fondacije Hastor.


Ove godine smo na teren išli Seid, Amela, Adisa, Samir, Aida, Hasan, Nejla, Ajla, Ernis i ja. Kako je to vrlo human posao, volonteri su se vraćali s terena puni lijepih utisaka, a i saznanja koliko je vrijedan rad koji su odradili, koliko su ljudi zahvalni Fondaciji Hastor, kako oni koji direktno primaju pomoć od Fondacije, tako i oni koji saznaju dokle se razvila Fondacija Hastor.

I dok bi me volonteri vraćajući se u kancelariju nazivali da mi kažu kako su svi već upoznati o radu

Fondacije i kako su ih svuda lijepo primili i pitali za mene, ja sam već bivao pozvan od pojedinih roditelja, direktora i načelnika općina da pitaju zašto ja nisam došao, jesam li bolestan i slično. Moram se zahvaliti svima koji se brinu za moje zdravlje. Ne bih se smio upuštati u imenovanje pojedinih osoba, ali moram pomenuti porodicu Tiro iz Tomislavgrada, porodicu Puhalo iz Trebinja, a tekst gospođe Ervine Avdibegović, pomoćnice načelnika općine Kladanj za društvene djelatnosti u oblasti obrazovanja ču prepisati od riječi do riječi: „Poštovani gospodine Ramo, čast mi je bila ponovo raditi sa super ekipom Fondacije Hastor. Ugovori su potpisani i sve je bilo odlično. Imala sam potrebu da Vam se javim i zahvalim za sve što ste do sada učinili i što činite. Danas ste nam jako nedostajali, i Vi i Vaša gospođa Fadila. Želim vam dobro zdravlje i svako dobro. Ervina Avdibegović“

Lijepo je steći toliko prijatelja, a posebnu draž čini saznanje da su to iskreni prijatelji koji se brinu za tvoje zdravlje, Boga mole i dovu čine da što duže poživiš u zdravlju i veselju. Pa šta bi čovjek još trebao poželjeti? Rečenica "... čast mi je bila ponovo raditi sa super ekipom Fondacije Hastor", dovodi da zaključka da je Fondacija Hastor sposobila puno osoba koje mogu i hoće nastaviti rad ka daljem razvoju i unapređenju Fondacije Hastor.

Ramo Hastor



Berina  
Daidžić

Dvadesetčetverogodišnja Berina Daidžić, nakon što je osnovnu škoju završila u Prači, obrazovanje nastavlja u Medicinskoj školi u Sarajevu. Godine 2013. upisuje Fakultet političkih nauka, također, u glavnom gradu Bosne i Hercegovine i tri godine kasnije stječe stručno zvanje Bakalaureat/Bachelora sociologije.

Ovdje se vrijedna Berina nije zaustavila i odmah po završetku I ciklusa upisala je i II ciklus na Odsjeku za sociologiju. Njeno zalaganje tokom obrazovnog procesa dovelo je do sjajnih rezultata. U julu ove godine završava II ciklus studija ocjenom 10 (A), čime je stekla pravo na akademsku titulu i stručno zvanje magistar sociologije.

Fondacija Hastor voli ljude pune entuzijazma, kao što je Berina, pa je još od 2007. godine njoj puna podrška.

Cetiri godine ona volontira na terenu s učenicima srednje škole, a trenutno je administrator-volonter

Zahvaljujući dugogodišnjoj posvećenosti i doprinosu radu naše Fondacije te spremnosti da se za potrebe Fondacije u svakom trenu stavi na raspolaganje, titula stipendistkinje mjeseca septembra zasluženo je pripala Berini Daidžić.

(protokol) Fondacije Hastor na osnovu čega stječe nova znanja i iskustva. Berina je bila uključena u honorarni projekat „Srcem za BiH“ i od organizatora tada dobija pohvalu i zahvalnicu.

"Smaram da je Fondacija Hastor, pored mojih roditelja, moja druga porodica, porodica koja je tu uvijek uz mene, prati moj rad i moje uspjehe... Biti dio ove porodice je izuzetno značajno. Divno je poznavati ljudе koji su dio Fondacije Hastor. Volontiranje mi je izuzetno pomoglo da steknem radne navike, u sklopu toga dva mjeseca sam radila u ASA Osiguranju, sektor za javne resurse, te sektor za finansije i računovodstvo."

Slobodno vrijeme provodi s prijateljicama, voli da crta i kaže da uživa u horor filmovima. Kroz život ide vođena motom: "Red, rad i disciplina."

Belma Zukić



Na osnovu baze podataka utvrđeno je da su stipendisti i volonteri Fondacije Hastor u proteklom mjesecu zabilježili 15557 volonterskih sati. Kao i do sada, najveći broj volonterskih sati ostvaren je na volonterskim sastancima naših stipendista – studenata, srednjoškolaca i osnovaca na 276 volonterskih radionica u 60 općina širom Bosne i Hercegovine. Ovoj velikoj brojci doprinosi i volonterski angažman naših studenata koji volontiraju u administraciji i redakciji Fondacije Hastor, kao i angažman stipendista koji rade na razvoju i održavanju aplikacije Fondacije Hastor i naše web-stranice, ali i angažman svih stipendista koji su u ovom mjesecu pomagali našim volonterima prilikom potpisivanja ugovora sa osnovcima i srednjoškolcima na teritoriji cijele BiH. Obavezna tema o kojoj su naši stipendisti diskutovali na svojim volonterskim druženjima proteklog mjeseca je „Važnost literature za čovjeka i odraz na njegovo ponašanje i govor“

Pored obavezne teme, stipendisti su obrađivali i druge interesantne teme, a naši studenti su dio volonterskih sati odvojili kako bi pomogli mlađim stipendistima da što bolje savladaju školsko gradivo.

15557

VOLONTERSKIH  
SATI

276

60

OPĆINA

## Neke od najzanimljivijih tema:

**Bosanskohercegovačka književnost**

Prva pomoć – moralna ili zakonska obaveza

**Osnovne norme  
ponašanja – bonton**

**Samo je jedna šansa za prvi utisak**

U zdravom tijelu zdrav duh

**Pozitivni obrasci komunikacije**

**Radionica: Mapa uma**

**Zdrave navike**

**Literatura iz moje mašte – radionica**

## Općine u kojima su u proteklom mjesecu održane volonterske radionice:



Poštovanje,

Javljam vam se s pomiješanim emocijama. S jedne strane, jako mi je žao što se ovim putem opraštам od Fondacije Hastor, dok s druge strane, započinjanje novog života, prihvatanje novih izazova budi mi radost i interesovanje. Nisam znala kako da se obratim, kome tačno, i najradije bih se svima zahvalila posebno, direktoru, učitelju Rami i svim administratorima, ali sam odlučila na ovaj mail pisati. Žao mi je što nisam prisustvovala zadnjem sastanku da se zahvalim onako kako sam zamisljala, ali sigurno da će vas prvom prilikom posjetiti. Naime, prošli mjesec sam održala sastanke i to su ujedno bili i moji zadnji volonterski sati. Ovaj mjesec sam promijenila svoje bračno stanje, adresu prebivališta, te neću više biti u mogućnosti da budem dio dosadašnje velike porodice. Fakultet ću naravno nastaviti, ali vanredno, jer neću biti sve vrijeme u našoj državi. Ovim putem se želim zahvaliti cijeloj Fondaciji Hastor na dugogodišnjoj moralnoj i finansijskoj pomoći, na volji, želji, trudu, novom znanju i svemu ostalom što ste mi pružali dugih devet godina. Bili ste moja druga porodica, neko ko cjeni čovjeka onakvog kakav jeste, ne pravi bilo kakve razlike među stipendistima, te samo dodatno motiviše da postanemo bolji ljudi i, doista, to i jesmo. Svaki stipendista Fondacije Hastor se ističe po mnogim vrlinama, a upravo ste vi zaslužni za to. Bila mi je čast biti dio vas, želim vam još mnogo uspjeha u daljenjem radu, pratit ću vas i dalje, jer vi ostajete moja druga porodica kao što ste do sada i bili.

Lijep pozdrav.

Amna Komarac